



*Le peuple au desert murmure contre Moÿse qui adoucit les eaux ameres,  
& leur fit des Loix & Ordonnances.*

**D**ANS les Israélites outre la mer Rouge, furent par eux chantées loüanges au Seigneur, & notamment par Marie Prophetesse, sœur de Moÿse & les autres femmes, qui en rendirent graces à Dieu, avec chants & instrumens. Puis Moÿse fit partir Israël des limites de la mer Rouge, pour entrer au desert de Sur, & cheminerent trois iours sans trouuer eau : Puis arriuerent en Mara, où les eaux estoient si ameres, que nul n'en pust boire. Lors le peuple murmura contre Moÿse, disant ; Que boirons nous ? Et il cria au Seigneur, lequel luy montra du bois, qui estant ietté en l'eau, les eaux furent adoucies. Et en ce lieu Moÿse leur fit des Loix & Ordonnances pour les tenir en leur deuoir, leur disant : Si tu écoutes la voix du Seigneur ton Dieu, & fais ce qui est droit deuant luy, & obeïs à ses commandemens, & gardes ses ordonnances, ie ne feray point venir sur toy aucune langueur. Adonc les Israélites poursuiuans arriuerent en Elim, lieu plaissant, delectable & ombrageux, à cause de septante palmiers, & douze fontaines qui y estoient, & y assirent leur camp aupres des eaux, où ils firent quelque sejour, non sans murmurer contre Moÿse, à cause des viures qui leur manquoient

*Exode 15. Chap.*